

Mwanachama wa Uh. ANC ajeruhiwa na bomu Maputo

MAPUTO, Msumbiji

MWANACHAMA mashuhuri wa chama cha ukombozi wa Afrika Kusini (ANC) amejeruhiwa vibaya wakati bomu lililokuwa katika gari lilipolipuka mjini hapa jana, watu walioshuhudia tukio hilo walisema.

Profesa Albie Sachs alipelekwa hospitali moja mjini Maputo akiwa katika hali mbaya baada ya kujeruhiwa na bomu hilo asubuhi kwa mujibu wa shirika la habari la Msumbiji (AIM).

Watu walioshuhudia tukio hilo waliliambia shirika la habari la Uingereza (Reuters) kuwa mlipuko huo uliharibu vibaya gari la Profesa Sachs na kuukata mkono wake mmoja.

Shirika la habari la Msumbiji lilisema utawala wa Makaburu wa Afrika Kusini umekuwa ukijaribu kumuua Profesa Sachs, ambaye ni mwanasheria, kwa kutega bomu katika gari.

Chama cha ANC kiliushutumu utawala wa Makaburu kwa kuhusika na mauaji ya mwanachama mwingine wa chama hicho, Ruth First, mwaka 1982 mjini Maputo, kwa kutumia bomu lililokuwa limetegwa katika kifurushi.

Mwezi uliopita, wakilishi wa ANC mjini Paris, Ndugu Dulcie September, aliuawa kwa kupigwa risasi na watu wasiojulikana nje ya ofisi yake.

ANC imewashutumu Makaburu kwa kuhusika na mauaji hayo na kuahidi kulipiza kisasi. Utawala wa Makaburu umedai hauhusiki katika mauaji hayo.